

Naqqiut

Siunnersuut 27. September 2024-meersoq taarserpaa
(Inatsisissamik inatsisilerinermik teknikkikkut aamma kukkunersiuinermik
iluarsiissuteqarpoq)

Uunga siunnersuut:

Pigineqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat

(Inissiat attartortittakkat allanngortinnerat, kaaviiartitsinissamut inerteqqut il.il.)

§ 1

Pigineqatigiilluni inissiat pillugit Inatsisartut inatsisaanni nr. 33, 23. november 2017-imeersumi, Inatsisartut inatsisaatigut nr. 19, 27. november 2018-imeersutigut allanngortinneqartumi makku allanngortinneqassapput:

1. § 8, imm. 5 imatut oqaasertalerneqassaaq:

” *Imm. 5.* Imm. 2-4 malillugit inissiap annertussusaata naatsorsuiffiginerani inissiami majuartarfinnut ilanngaateqartitsisoqassanngilaq. Torsuusat, majuartarfiit majuartarfiillu sangoriaat ataatsimoorussat, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.”

2. § 8-mi imm. 6-tut ilanngunneqassaaq:

” *Imm. 6.* Naalakkersuisut inissiap annertussusaanut sanaartornermi iluserineqartut tulluarterippassuk imaluunniit pisariaqartippassuk imm. 2-5-imut saneqqutsisut naatsorsuiffiginissaannut akuersissuteqarsinnaapput.”

3. Immikkoortumut qulequtaq ”Taarsigassarsititsinissamik neriorsuuteqarneq” sioqqullugu 10-p kingorna ilanngunneqassaaq:

” § 10 a. Namminersorlutik Oqartussanut nunatsinnilu kommuninut qularnaveeqqusiussaarluni taarsigassarsititsinermut allagaq aamma akiitsunut uppersaat illuliortiterneq pillugu Inatsisartut inatsisaat manna imaluunniit siusinnerusukkut inatsisaasut naapertorlugit tunniunneqartut kaaviiartitanut, qularnaveeqqusiisarnernut imaluunniit akiliisitsisussamit malersorneqarnissamut atorneqarsinnaanngillat. ”

4. § 13, imm. 2 imatut oqaasertalerneqassaaq:

” *Imm. 2.* Taarsigassarsiat annertussusissaat sanaartukkanut naatsorsuutit inaarutaasut tunngavigalugit naatsorsorneqassapput. Sanaartornermut naatsorsuutini piginneqatigiilluni inissiat sanaartornerannut atasumik aningaasartuutinnortut tamarmik ilanngunneqassapput. Sanaartukkanut naatsorsuutit kukkunersiuisartumit nalunaarsorneqartumit, kukkunersiuisumit naalagaaffimmit akuerisaasumit imaluunniit Kalaallit Nunaanni aningaaserivimmit uppersarneqarsimassapput.”

5. § 22, imm. 2 imatut oqaasertalerneqassaaq:

” *Imm. 2.* Neriorsuutit allakkiap suliarineqarnerani ulluliunneqartumit ukiut marluk qaangiutsinnagit sanaartugassaq aallartinneqarsimanersoq, aallartinneqarsimannginnersorluunniit pillugu sanatitsisoq kommunalbestyrelsimut paasissutissanik nassitsissaaq. Sanaartugassaq aallartinneqarsimassappat, tamanna pillugu sanatitsisup uppersarsagaanik, sumiiffimmilu kommunimi teknikkimut ingerlatsiviup uppersarsagaanik uppersarsaat ilanngullugu nassiunneqassaaq.”

6. § 22, imm. 4, imatut oqaasertalerneqassaaq:

” *Imm. 4.* Neriorsuutit allakkiap suliarineqarnerani ulluliunneqartumit ukiut pingasut qaangiutsinnagit kommunalbestyrelsimut atuilernissamut akuersissutip assilinera sanatitsisup nassiutissavaa.”

7. Kapitali 4-p kingorna ilanngunneqassaaq:

“ **Kapitali 4a**

Namminersorlutik Oqartussat kommunillu inissiaataat attartortittakkat piginneqatigiilluni inissiatut allanngortinneqassapput.

§ 45 a. Naalackersuisut imaluunniit kommunalbestyrelsip illuutip attartortittakkap pioreersup piginneqatigiilluni inissiatut najugassanngorlugu allanngortinnissaanut aalajangiisinnaapput. Allanngortitsinissaq illuutit attartortittakkat pioreersut Naalackersuisut imaluunniit kommunalbestyrelsip piginneqatigiilluni inissiaatillit peqatigiiffiannut pilersinneqartumut ataatsimut tunisinikkut pissaaq.

Imm. 2. Naalackersuisut imaluunniit kommunalbestyrelse piginneqatigiilluni inissiaatillit peqatigiiffianni inissianut tamanut atuinissamut pisinnaatitaaffik atorlugit piginneqataasutut ilaalissapput.

§ 45 b. Naalackersuisut imaluunniit kommunalbestyrelsi allanngortitsisoqarnissaanut aamma piginneqatigiilluni inissiaatillit peqatigiiffiata pilersinneranut atasumik pisortat innaallagissamik, imermik, kiassarnermik aqqusersuutinillu pilersuinerannut illuutininik attartortitsisoq piginneqatigiillunilu inissiaatillit peqatigiiffiat aalajangiinissamut

pisussaaffeqalernissaannik, tassungalu piumasagaatinik aalajangersaasarnissamik, peqqusinnaavai.

§ 45 c. Naalakkersuisut imaluunniit kommunalbestyrelsi illuliortiternernut ilisimasalimmik atorfinitsitsissapput, taannalu illuutitut attartortittakkanut qanoq issusermut nalunaarusiamik suliaqassaaq. Naalakkersuisut imaluunniit kommunalbestyrelsi sulianut ilisimasalimmik kimulluunniit attuumassuteqanngitsumik atorfinitsitsissapput, taannalu illuutitut attartortittakkap niuerfinni naleritinneqartumik naatsorsuissaaq.

Imm. 2. Qanoq issutsinut nalunaarusiat, niuerfinnilu naleritinneqartumik naatsorsuinissaaq pillugit Naalakkersuisut malittarisassanik aalajangersaasinnaapput.

§ 45 d. Illuutitut attartortittakkat pioreersut piginneqatigilluni inissiaatillit peqatigiiffiannut tunineranni pisinermi akia tamarmi piumasagaatillu allat Naalakkersuisunit imaluunniit kommunalbestyrelsimit aalajangersarneqassapput.

Imm. 2. Illuutitut attartortittagaq niuerfinni akigitinneqartoq atorlugu tunineqassaaq, taamaattoq inissiaq tamakkerlugu minnerpaamik 7.000 kr./m²-imut akeqassaaq. Naalakkersuisut Inatsisartut Aningaasaqarnermut Akileraartarnermullu Ataatsimiiititaliaata akuersissuteqarneratigut illuutitut attartortittagaq akigitinneqartumit minnerpaaffiusumit akikinnerutillugu tunisinaavaat. Kommunalbestyrelsi Naalakkersuisut akuersissuteqarnerisigut illuutitut attartortittagaq akigitinneqartumit minnerpaaffiusumit akikinnerutillugu tunisaqarsinnaavoq.

§ 45 e. Naalakkersuisut kommunalbestyrelsillu piginneqatigiilluni inissiaatillit peqatigiiffiata illuummik attartortittakkanik inissiartaqartumik tigusineranut atatillugu, atugassarititaasut sukumiinerusumik isumaqatigiissutaareersut tunngavigalugit piginneqatigiilluni inissiaatillit peqatigiiffiannit ininik attartornissamut pisinnaatitaaffeqarnissani piumasarisinnaavaat. Taamatuttaaq tigusinermi attartortut allaluunniit illuummut tunngatillugu atuisinnaatitaasut, tassunga ilaallutik inuussutissarsiutinik ingerlatsinissamik pisinnaatitaaffeqartut, tigusinermi pisinnaatitaaffeqarnerisa atuutiinnarnissaat piumasarineqarsinnaavoq.

§ 45 f. Naalakkersuisut imaluunniit kommunalbestyrelsi illuummik attartortittakkamik Naalakkersuisunit imaluunniit kommunalbestyrelsimit piginneqatigiilluni inissiaatillit peqatigiiffiata pisineranut taarsigassarsititsissapput. §§ 3-10 assinganik atorneqarput, taamaattoq takuuk imm. 2.

Imm. 2. Naalakkersuisut imaluunniit kommunalbestyrelse pisortat taarsigassarsiarititaannut, tigusinerup nalaanni amigartumik aserfallatsaaliuisoqarsimaneranut uppersarneqartup pilerseqqinnissaanut piginneqatigiilluni inissiaatillit peqatigiiffiannut taarsigassarsiaritinneqartunut, tulleriarinermut uppersaanissamik nalunaaruteqarsinnaapput.

Imm. 3. Naalakkersuisut imaluunniit kommunalbestyrelsi piginneqatigilluni inissiaatillit

peqatigiiffiani inissianut piginneqataaffiusunut immikkut nammineerluni aningaasaliissutissanik akiliteqassapput.

§ 45 g. Piginneqatigiilluni inissiatillit peqatigiiffiannut inissiamut akitsuummut inissianut piginneqatigiiffimmut atuinissamut pisinnaatitaaffimmut ilaasumut aalajangersaaffigineqartumut piginneqatigiilluni inissiatillit peqatigiiffiat Naalackersuisunut imaluunniit kommunalbestyrelsimut akiliisitsiniassapput.

§ 45 h. Piginneqatigiilluni inissiat kapitalimut uunga ilaasut allanngortitsisoqareernerata kingorna piginneqatigiilluni inissiatillit attartortuinut pioreersunut tuniniarnissaat neqeroorutigineqassaaq. Piginneqatigiilluni inissiat inoqangitsut imaluunniit inoqarunnaartut tuniniarnissaat neqeroorutigineqassaaq.

Imm. 2. Naalackersuisut imaluunniit kommunalbestyrelsip piginneqatigiilluni inissiamik tunisinerini akeq anguneqarsinnaasooq pitsaanerpaaq atorlugu, taamaattoq tak. imm. 3, aammalu massakut inatsisartut inatsisaat atuuttoq peqatigiiffiullu ileqqoreqqusai naapertorlugit piginneqatigiilluni inissiatillit peqatigiiffiat aqutigalugu pissaaq. Taamaattoq piginneqatigiilluni inissiatillit peqatigiiffiat piginneqatigiilluni inissiap attartortumut pioreersumut tunineqarnissaanut akerliusinnaangilaq.

Imm. 3. Piginneqatigiilernermi pisinermi akia tamarmiusooq minnerpaamik Naalackersuisut imaluunniit kommunalbestyrelsip nammineerluni akiliutigisimasaasa naleqqatigissavaa. Inissiatillit peqatigiiffiata piginneqatigiilluni inissianik tigusineranit qaammatinit aqqaneq-marlunnit kingusinnerusumit piginneqataassutsimik tunisinermi Naalackersuisut imaluunniit kommunalbestyrelsip nammineerluni akiliutimi 20%-ia tikillugu akikilliliissuteqarluni piginneqataassutsinik tunisisinnaavoq.

Imm. 4. Piginneqatigiilluni inissiatillit peqatigiiffiat pissutissaqarnani uninngaqqaarmani piginneqataassutinik tuniniaasinnaavoq. Piginneqatigiilluni inissiatillit peqatigiiffiat piginneqataassutinut inummik pisisussamik takutitsinnaangippat, piginneqatigiilluni inissiatillit peqatigiiffiata piginneqataassut tamanut tunisassanngorlugu pilerisaarutigissavaa.

§ 45 i. Naalackersuisut imaluunniitkommunalbestyrelsi piginneqatigiilluni inissiap inoqangitsup tuniniarnissaanik pinngitsoortitsisinnaapput inissiarlu piginneqataaffigineqartoq allamut attartortilerlugu. Attartortitseqqinneq piginneqatigiilluni inissiap tuninissaa piginneqatigiilluni inissianut, inissianut pigisanut aamma inissianut nammineq pigisanut sumiiffimmi pineqartumi niuerfinni akigitinneqartunut malunnaatilimmik ajortumik sunnuteqarsinnaanera ilimanarsimappat pisinnaavoq.

Imm. 2. Allamut attartortitsineq taamaallaat atugassarititaasut piffissamut killiligaasut tunngavigalugit aammalu qaammatit 12-ikkaarlugit pissaaq, qaammatit 6-ikkaarlugit sivitsuisarnissaq periarfissaqarluni. §§ 63-65 taamaaqataanik atuutissapput.

Imm. 3. Attartortitseqqinnermik isumaqatigiisummik sivitsuisoqartinnagu piginneqataassutsip tunineqarnissaanut periarfissat Naalackersuisut imaluunniit kommunalbestyrelsip nutaamik naliliiffigissavaat.

§ 45 j. Attartortoq, inigisaminik attartortittakkamik piginneqatigiilluni inissiatut tigusinissamik kissaateqanngitsoq, inissiamini attartortittakkami najugaqaannarsinnaavoq.

Imm. 2. Naalackersuisut imaluunniit kommunalbestyrelsi piginneqataasutut, attartortup piffissami attartorfiusumi iliuuseqarnerinut, iliuuseqannginnerinut aamma aalajangiinerinut allanut, piginneqatigiilluni inissiatillit peqatigiiffiannut tunngatillugu, akisussaasuvoq. Attartortoq § 65 malillugu nammineerluni pisinnaatitaaffimminik killilersuiffigineqarnissaa pillugu allakkatigut ilisimatinneqassaaq.

Imm. 3. Attartortumut inissiami najugaqaannartumut ineqarnermut akiliut Namminersorlutik Oqartussat kommunillu inissiaataannut attartortikkanut ineqarnermut akiliutit naatsorsortarnissaannut malittarisassat nalinginnaasut qaqugumulluunniit atuuttut malillugit aammalu inissiat attartortittakkat pillugit inatsisit qaqugumulluunniit atuuttut malillugit aalajangersarneqassapput.

Imm. 4. Piginneqatigiilluni inissiatillit peqatigiiffiata ileqqoreqqusaani aalajangersakkat attartortumut illuummi najugaqaannartumut atuutiinnassapput. “

8. § 49, imm. 4 ima oqaasertalerneqassaaq:

”Imm. 4. Imm. 1 aamma 3 atuutissanngillat Naalackersuisut, kommuni imaluunniit sanatitsisoq namminersortoq piginneqatigiilluni inissiatillit peqatigiiffianni piginneqataasutut inississimappata. ”

9. § 55 imatut oqaasertalerneqassaaq:

” § 55. Piginneqatigiilluni inissiaq najugaqarfissatut najornerata saniatigut siunertanut allanut atorneqaqqusaanngilaq, taamaattoq takuuk imm. 2, § 45 aamma § 45e.

Imm. 2. Piginneqatigiilluni inissiap inuussutissarsiortunut namminersortunut mikinerusunut atorneqarsinnaanera ataatsimeersuartut akuersissutigisinnaavaat, inuussutissarsiullu piginneqatigiilluni inissiap piginnittuanit taassumalu inoqutigiiivinit ingerlanneqarsinnaavoq. Inuussutissarsiortut namminersortut mikinerusut pisisartut pulaartarnerannik kinguneqartitsissanngillat.”

10. § 61-imi imm. 2-tut ilanngunneqassaaq:

”Imm. 2. Najugaqartussaataaermermi Naalackersuisut, kommuni imaluunniit sanatitsisoq namminersortoq piginneqatigiilluni inissiatillit peqatigiiffiannut piginneqataasutut ilaalersoq ilaatinneqanngillat. ”

§ 2

Inatsisartut Inatsisaat ulloq 1. januar 2025 atuutilissaaq.

Imm. 2. § 1, nr. 6, Namminersorlutik Oqartussat kommunillu illuutaanni attartortittakkani kingusinnerpaamik ullormi 31. december 2024 atuilernissamut akuersissut tunniunneqartoq atorlugu atorneqartassapput.